

Le trézà dè Tsantonaïre

Din noutre biô pa-i, dè to tin, l'a z' u di trézà ! Adon a no dè li trovâ !

Sin sè pasâve din le tin yô li Laïtronin s' ingadjèv'on, li tsôtin, min bardjé din li moutagne.

In sé tin li, on moutagnâ kè partive fire la saïzon in n' Italeye, l' alâve dè son pâ dè moutagnâ inô pè la Konbe di Mà, pè le vayon du Gran Sin Barnâ. Di daraï on grèpon, i vaï tè pâ yu arevâ on n' omoueu, vêtu min on avouokâ, é kiè laï di :

É ! Tè mon pouretè, yô te vâ ?

Yeu vase u pa-i du Val d'Aoste fire la saïzon min bardjé ! laï repon le Laïtronin

Ô é ! maloreu, t'i bin tarâpe d' alâ kièri dè travô se via, kin t' â on trézà din li moutagne a tè.

On trézà ? Y'é jamê avoui prèdjé de tô sïnse

Adon, akieüt'a mè ! Va inô su la plane dè Tsantonaïre, apoupri a sïnkante pâ daraï li réste dè la Kabâne kiè l' è z' u demoutâye pè l' avalintse dè la Din Fâvre, te vèri onna monstr'a barme naïre. Yé tè sinbleri tan pèzante kè tè pinse pâ pouevaï la beüdjé, mi te poueraï la soulèvâ avoui on vouaré. Le trézà l'è li dézo ! Se te le veü, te poueraï le prindre, mi tsavouey'a tè : tè fôdrè itre yô é pâ moutrâ kè t'â pouaïre dè le fire !

Su sin le Mouseu l' è z' u via !

Le Laïtronin kiè l'avive yu mi dè yene u dâvoueu d'âtre din hla via dè moutagnâ, l'a sondja onna vouerbe é pouaï l'a pinsô a la saïzon dè bardjé kè l'alâve fire é kè sarâye tin d'alâ vère le trézà apri.

Dè to le tsôtin, l'a pâ ublô sin kè le Mouseu l'avive dè. Kin l'è vèneü l'eüton, dètir kè l' è z'u a maïzon é dèvan kè la ni suse bâ, l' è partaï inô a Tsantonaïre.

L' è arevô inô li, l'avive gnou, pâ dè dzin pâ dè bitche.

L'in n'a pâ z'u pouo troua lontin pouo trovâ la grôsa pière, onna barme grand'a min onna maïzon, é min l'avive de le Mouseu, l'a pouosu la soulèvâ avoui le vouaré.

Din le trou gnê dézo la pière, l'a yu dè Djabla grô min on mouodzon, avoui dè z'ouaï kiè tsalenâv'on rodze min li brâze dè la fordze.

L'a pinsô a sin kè l' avive promètu, mi dèvan dè monstre dïnse, l'a rekanpô é l'a vouêhlô ! D' on kou, la pière sè remètu in plase. L' a z'u biô éprovô dè la rèbeüdjé avoui le vouaré, rin n' a fire; i l' è mimoueu retornô pié tâ avoui on pèk é dè la peüdre naïre : i l'a rin z' u a fire, l'a pâ pouosu la beüджа d'on peüdze é le trézà dè Tsantonaïre l'è teti li, inkondu dézo hla monstr'a barme naïre.

Vouo peüde alâ inkouo la vère vouor, se vouo vouolaïde pâ mè krêre !

Mètu in patouê pè : Le Bagnâ